

(四縣腔)

【都市大樹下个原生態】彭瑞珠原作

在吾屋下附近仔，有一間當大、當大間个大賣場。佢兜个停車場脣，還留等原旦種在舊工廠脣个老樹仔，樹下乜還留等一大片个空地，分植物做得用原生態个方式自由大。佢試著，這空地有同這間外國連鎖店加分，因為，佢有分人一種尊重臺灣植物、珍惜臺灣在地生態个感覺。

成時，佢會在樹下臥頭看，看該兜鳥仔，在高天天个樹頂，高高飛、高高奈；有時節，佢會坐在停車場脣个紅毛泥矮牆，看該兜揚尾仔、金姑仔，在高天天个大樹下，定定仔飛、慢慢仔奈。

該兜，翼還㗎燥个揚蝶仔，乜毋使驚會分瞞等佢兜、隨時都有可能擲¹過來食忒佢兜个鳥仔！因為，四圍都係人屋、車仔、大路，大路該片還有火車不時下南上北，在該確樂確樂²！故所，鳥仔佢兜乜想愛飛高高、較自在，係無，若係橫打直過撞著人，抑係分車仔撞著，該就衰哩！故所，這樹頂、樹下，有無共樣个生活速度、無共樣个生活方式。

¹ 擲：音 xio；快速擊中或撞擊。

² 確樂確樂：音 kog log kog log；此指火車行進的聲音。

你看，該兜錢七³，在樹下放勢牯遛，遛到一哪仔、遛到一圍牆！大賣場裡肚乜有賣錢七，幾皮仔就愛賣幾下十銀。該，這一哪仔都係，仰無人摘呢？第一、該，又毋係偲个東西！第二、你毋驚，有細狗仔正滲啊過尿哦？哪有人，恁無衛生！

熱天个大樹下，該兜葉仔像分床公婆做過記號樣仔个冷飯藤⁴，還會開出一禽⁵禽个細白花，當得人惜！白花無恁白地，就會間等有烏烏个細果子仔，安到「烏蠅屎」；這，同偲兜發在面頂个烏蠅屎無共樣，係食得个烏蠅屎。你問佢，會去同人偷摘來食無？該，佢無恁慫哪！就同你講過，係有細狗仔正滲啊過尿，該毋就……，仰會恁慫呢！

白飯仔開花地，做得轉去姐公个山園啊，該位，乜有野生个烏蠅屎，無人洩農藥、乜毋會有狗仔去躡⁶。係無，偲乜做得自家種啊，用花鉢仔，種出偲自家个「原生態」來，你講係無呢？

³ 錢七：音 qien∨ qid\；洋落葵，又稱川七、藤三七、土三七等。

⁴ 冷飯藤：音 lang∧ fan ten∨；火炭母草，又稱白飯草、白飯藤、烏飯菜等。

⁵ 禽：音 po∧；量詞，串。

⁶ 躡：音 lien；反覆踩踏。